



# Mangapampangan

2022 © Anac Ning Arenas

Tamu

**Sinulat:** Anac ning Arenas

**Imprenta:** Kapampangan Publishing Services

**Email:** capampangan@whereishome.info

Imprenta: Kapampangan Publishing Services  
Karinan: Magalang Pampanga  
Email: [capampangan@whereishome.info](mailto:capampangan@whereishome.info)

2022 © Anac Ning Arenas

Copia Bilang 2 – Junio 19, 2022.

## Kalamnan:

<b>Apipisabi Mu</b> .....	3
<b>Crusada:</b> Mangapampangan Tamu.....	4
<b>Corido:</b> Adarna, Ing Encantadang Ayup .....	8
<b>Istorya:</b> Poetang Kapampangan .....	13
<b>Nobelə:</b> Aracnidu –Prinsiping Babagua.....	17
<b>Palaisipan:</b> Kurusan-Amanu #2 .....	20
<b>Kuwentu:</b> Kapalaran.....	22
<b>Kanta:</b> Anak a Masipag.....	24
<b>Poesia:</b> Kapampangan Tamu .....	25
<b>Kumidya:</b> Pasalwan na po .....	27
Salamat pu keng pamamasa.....	27

## *Apipisabi Mu*

Banuang 2011.

Ding aldo ra pu ring bulan a Mayo at Junio 2011 aldo lang pamanagcat at amun quecatamung cabalen a lulugud, magmasabal at magmaragul qng panga-Capampangan tamu. Ren pung aldo at bulan a reti panaun na la ning pasibayung pamisulat queng istoria at pamitala qng casaysayan na ning Labuad Capampangan, nung nu ring memalen mirinan lang pamicatagun, tsansa, at pagcacataun ban apasiag da ing carelang lugud at masabal, emu qng salita nune qng gawa, banting-upyang e miras ing catatacutan a aldo nung capilan micabit ya queng aun ning pangacalinguan ing Amanung Sisuan.

Ditac la mu pu ring bulan at macuyad la mu ring aldo ban misagawa at mirinan-catuparan ing capagnasan a iti. Nung inya pu e tamu sana sasayangnan ing panaun queng pamanenaya at pamag-ata-ata.

Datang pu ing aldo, managumpe ya man o mabigu ing parasan a iti, balicdan de ring daratang a generasyun - ding anac at anac da ring anac tamu - at mausga tamu queng quecatamung mequing pasya at pamanalacaran tungcul caniti.

Opu, datang pu ing aldo, managumpe ya man o mabigu ing proyectung a iti, misalba ya man o malumpawi ing Amanung Capampangan, balicdan de ring daratang a generasyun at abasa dala ring ginunyat mequisanmetung at pepaquit tune lugud qng Daing Capampangan, at ding lulugud mu at mamarali qng salita.



## **Crusada: Mangapampangan Tamu**

Mayu 6, 2011 – Mikatawan ya ing proyektu, kapamilatan nang Myra Paz Lopez (sinulat ne keng Ingles), a milikas keng kepampangan anti keng lalam.

### **I. Proyektu Titulu: "Mangapampangan Tamu"**

Keng ikapanatili ning Amanung Capampangan 4

## II. Paintulid

Y Direktor Robby Tantingco, ning Centru para keng Pamagaral Kapampangan (Center for Kapampangan Studies), Holy Angel University, sinulat na keng metung a artikulu a mapaliaring mabating ya kekatamu ing Amanung Sisuan kilub ning kulang dinalan a banua nung ala tamung gawan a takbang tungkul kaniti. Ing Center, karing milabas a apulung banua, inumpisan nang mangampanya kapamilatan ning: a) pamanengganyu karing lokal a Talasulat Kapampangan ban isundu ra ing karelang gagawan; b) pamaglimbag babasan o periodikung Kapampangan; c) pamanatag maliwang pang-kulturang kompetisyun at aktividades para keng ikalabung ning Amanu; d) pamakiagpangan karing upisinang pang-gubyernu at pang-edukasyun; at e) alang patugut a gawang pamanyalugsug tungkul keng kulturang Kapampangan.

Base kareting mebanggit, pagnasan tamung isubung ta pang lalu ing pamipalawig keng pamangamit ning Amanu keng kabilugan a labuad Kapampangan kapamilatan ning pamanake karing memalen, ding aldaldo asasalubung tamung Kapampangan keng publiku antimo karing palengki, ding malls, keng dalan, pisamban, pampaaserung saken, at aliwa pa. Iti magsilbing asakatuparan keng saup da reng

sablang Kapampangan a lulugud keng karelang penibatan, ing karelang labuad, kultura at Amanu.

### III. Pamaglarawan

Ing metung a mabilisang pamangampanya a managkatan "Mangampangan Tamu", panagkat neng itangka ning Anac Ning Arenas, metung a Talasulat Poeta Laureadong Kapampangan kasalukuyan manuknangan Australia. Iti maging pamidaupan yang proyektu kayantabe ning Center for Kapampangan Studies a panimunan nang Robby Tantingco, ing Pampanga Language Council a luluklukan nang Erlinda E. Cruz at ning Parnasong Kapampangan a kalulupunan nang Anac Ning Arenas. Ing proyektu maglayunan yang mag-imprentang materialis antimong posters, banners, stickers, at bookmarkers a manamuyut karing Kapampangan ban mangapampangan la keng aldaldo rang pamibie-bie. Deting materialis mikalat la at mipaskil kareng pampasaerung saken antimong dyip at traysikel, kareng malls, palengki, tindahan, eskuwelahan, pisamban at aliwa pang lugal nung nu la madalas mikit-ikit deng tau, pati na karing munisipyu.

Ing kampanyang iti maragul yang maging suporta keng Department of Education's Order No. 74 a magpatupad keng pamangamit ning pam-

prubinsiyang lenguahi karing mumunang atlung balitang ning edukasyung primary.

---


***Maragul a pasalamat kareng makatuking  
mebanggit keng babo kasulatan.***

***Myra Paz Lopez – CKS/HAU***

***Robby Tantingco – CKS/HAU***

***Erlinda Cruz – Pampanga Language Council***

--- Atin ya pung katuglungsung keng tutuki ---



## Corido: Adarna, Ing Encantadang Ayup

...

Ating ayup a Adarna  
Queng leguan alang capara  
Nung damdaman meng magcanta  
ing saquit mu mipaldan ya.

Qng Tabor a cabunducan  
Carin ya ing pagcarinan  
Dutung ya ing piapunan  
Batumg Pilac ya calagyuan.

Nung aldo e me atucup  
Iting encantadang ayup  
Nung nu ya salasalicup  
at magpalipas caranup

Nung benging cataimican  
E pimale ning ninuman  
carin ya pa ing ulianan  
Qng Tabor a cabunducan

nya macamal a monarca  
Ya ing paracap yu ita  
Cumayap pung ala sala  
ing saquit yu pung darala.

Cabud dimdam na ning Ari  
Queng saquit na ing pamawi  
Yang tiburan nang piragli  
Ing pangane nang palipi

Memintu ya ing Don Pedro  
Queng utus ning mal a bapu  
gueyacan ne pangamismu  
ing saquenan nang cabayu

Meco ne pi't linacad ya  
Qng cabunducan pinunta  
at pantunan neng tagana  
ing mal a ayup Adarna



Maiguit a atlung bulan  
Pamasle queng capatagan  
E ne balung taluntunan  
Ing Tabor a cabunducan

Atin yang disan a landas  
pasalunga yang papaitas  
delanan ne pangacaras  
ning principing atmung gilas

Qng e map a capalaran  
queng Dios a queyang caburian  
inyang miras cababoan  
ing cabayu mate ne man

Bista't nanung agawa pa  
saquenan quealan ne ya  
quinua na ing abastu na  
at linacad pangaqueta

Queng calub na ning Dios naman  
caring taung bininyagan  
masalese ne mang disan  
ing Tabor a cabunducan.

Atin yang iquit a dutung  
capansin-pansin a labung  
caring sablang lupung-lupung  
bucud-tangi ya salilung

Ding bulung sacdal la leguan  
para-para ngang quiquinang  
diamanti ya cabagayan  
macasilo panimanman

Carin apisip-isip na  
qng lub na at panalala  
carin ne pa magpainawa  
iting principeng maporma

Ing linub qng pilubluban  
iting dutung yang tanaman  
marail nang piapunan  
ning ayup cung piglacbayan

Ba inyang mabibengi na  
ing aldo payalbug ne ya  
sablang ayup ati na la  
at ding aliwa cuyug pa

Caring dacal dang dinalan  
alang dinugpa metung man  
meguldu nang pigunaman  
ning principeng matimtiman

Macaniting siquit a pun  
alang ayup a mamapun  
yacung queni mipayapun  
queng pamanayang maratun

At linub queng panalala  
queng lub mung dilidili na  
ing ya na pang magpainawa  
at cabucasan lumarga.

--- Atin ya pung katuglung keng tutuki ---

## **Jstorin:** Poetang Kapampangan

Jose Mauro Manapul Gallardo

Kebaitan: Enero 20, 1918

Poeta Laureado: 1950

Ari Ning Crissotan: 1952

Ari Ning Parnaso: 1979

Kematayan: Eneru 08, 1986

King balen na ning Candaba, barrio Gulap, mibait ku. Enero beinti ing petsa, mil nuebe siyentus disyotsu. Mebinyag kung lagyung Jose Mauro Manapul Gallardo. Di Eugenio at Romana ila pin ding pengari ku.

Aku mu ing meging bunga ning karelang pamiasawa. Bista man ing kakung Ima atin neng anak minuna. Apat la ding kapatad ku keng minuna nang asawa, di Laureano, Bonifacio, Saturnino at Marciana.

Ing bale kebaitan ku, metung yang kubung garosa. Inaus deng kubung garosa uling neng panaun'na ning pamananaman pakwan, ing kubung yan pakulyut ya keng damulag ban kanita, ketang pinak idulung da.

Potang yari nong miligpit deting mitanam a pakwan saka re'isaka na naman karin king baryu ituknang.

Asali de ring pengari ku at megi dang karinan angga king mibait ku at mig-walung banua keynakan.

Likwan mi ya iting kubung garosang kekaming bale inyang mate ya'ing asawa nang Laureano ming pangane. Linipat ke king bale na ban kanita asopan ne ning pengari kung babai karing anak na manese.

Ing pengari kung lalaki, ing keyang kapanintunan pamangobrang jueting ampon pamanaring sasabungan. Iting kapanintunan na alang tiyak a panakitan. Ing agisngan kung kabyayan, mengatmu king kasakitan.

Seli na kung katun\* inyang edad na kung limang banua ning pengari kung lalaki at mamasa tirwanan na. Malagwa kung metalustus keng pamamasa mebiasa, nung inya sa keng edad kung anam pang banwa kanita tiki na nakung magdikta o mampuntang kumidya, pablasang ing pengari ku ya ing direktor kanita karing sablang kumidyantis ning mabilug a baryu da.

Ing pengari ku metung ya karetang peka-mailig keng pamamasa nung nu ku miawa at mipausig. Inya balang piestang balen asiguru mung manalig nung atin ya mu ring pera, e malyaring e magpilit saling nobela't kurirung e na pa abasa't ikit a tinda ring magpiperya, pakalapag o sasabit.

Mumuna kung miputungan anting Laureadong Poeta merapat king barrio na ning Sto. Cristo, balen Guagua. Sinambut ku king ligligan keti probinsiya Pampanga. Inuli ke ing tropeo nang Yuzon, petsang singkuwenta.

Oktubri, 1951, tinanggap kung pa-aniaya menibat king Aguman ding Kapampangan keti bansa, ban lauk ku king ligligan na ning eliminisyun pa. Pamamili keng Ari Ning Crissotan caring makudta. Ing "Amanung Kapampangan" keng ligligan ya ing tema.

King meging eliminasyun dose semi-finalists la. Karing labing-aduang deti ing kanaku ing menimuna. Ike namang labing-adua, pasibayung milaban pa, ban ding finalist a adua keti naman mapili la, at king Manila International Fair mag-Crissotan la. King kaduang eliminasyun aiti dinian da keng tema - ing "Bakit Misalbag la ring Kapampangan" yang binie ra.

King International Fair o Pampango Night king carnabal, ketang Enero 5, 1952 ke milaban. Ding lupun a talayatul, atlu lang abugadu ngan Jose David, Max Llorente at y Silvestre Punsalan. Ing Dr. Amado Yuzon ya ing Lakandiwa naman.

Ding huradu mikakametung la mu king kayatulan, a  
yaku'y Jose Gallardo ing sinambut king labanan.  
Dela keng minuli ing taguring Ari Ning Crissotan.

--- ooOoo ---

Pikuanan: Makuyad a Kasalesayan King Kanakung  
Bie, Excerpts from an unpublished autobiography  
of Jose M. Gallardo (in Kapampangan)  
Published by: The Juan D. Nepomuceno Center  
For Kapampangan Studies, Holy Angel University


## Nobelə: Aracnidu –Prinsiping Babagua

...

Canita pinulandit ya  
queng calibudtan ning centru  
linucluc yang mala-Ari  
quetang palacio na't tronu  
lidlad nong gamat na't bitis,  
mata't radar na alertu  
metung ne nanamang disgu  
ding susulapong insectu.

'Tiu queng macaniang cabilian  
iniang alang male-male  
asipat ne nitang anac  
babu biyabas lawe-lawe  
panaquit na cang Babagua,  
baguia-baguia yang linele  
at quetang cayang paniungquit,  
sinquit neng pacalale.

Macanyan man e mesira  
lub ing mebiglang Babagua  
bista man atiu ne danggut  
nining patpat a macaba  
at cabang ing mangangasu  
bababa neng baguia-baguia  
quetang cayang aguiung binit  
linundag yang biglang-bigla.



Nanu pu cayang maliari  
cang Babaguang meca-lundag  
nu ya caya anti laut  
quening mangasu mipadpad  
nanu caya ing suwerti nang  
manenaya't macasucad  
tara taluquian taya pu  
at queng tutuki isadsad.

--- Atin ya pung katuglung keng tutuki ---



## Palaipan: Kurusan-Amanu #2

1	2	3	4	5	6		7	8	9	10	11	12
13						14		15				
16									17			
18							19					
20		21					22				23	
23	24				25				26	27		
	29			30				31				32
32			33		34		35					36
	36	37				38				39		
40	41				42				43			
44				45								
46			47		48							
49						50						

### PABAKLE

- 1 Singkuwenta sentimus  
 7 Agisan  
 13 Pilmi  
 15 Salita  
 16 Pamirasung luyus  
 17 Pekamatas a baraja  
 18 Atitindang lalakad  
 19 Kapamilatan ku (3,2)  
 20 Neya o keya  
 21 Ibunyag  
 23 Aturan gilid  
 25 Bague e kasiping

### PABABA

- 1 Pota nang kayi (4,2)  
 2 Asisigi  
 3 Pamangawang dase  
 4 Ikua ne keng pera (5,2)  
 5 Pa-atyat  
 6 Itindang lalakad  
 8 Nota  
 9 Milagru  
 10 Mamait-mait a bulung  
 11 Sapni  
 12 Mumutut  
 14 Alako panga-kulubung

26 Magalang pakibat	19 Parsakali
29 Ikabit	22 Siguru
31 Metung	24 Ika-antala
32 Siguru	27 Mailig mamasa
33 Kalame ubi	30 Kabalintuna ning Wa
35 Paputian keng aldo	31 Ika, ila at aku?
36 Eme pa sewan (4,2,2)	32 Pagtsa-apat
39 ?nak ?apampangan	33 Asus
40 Kabaliktara' ning atilu	34 Ali me sana (1,2,2)
42 Palaging payat (1,6)	35 Puntaan ipas
44 Sati	36 Abawas, antimo salipo
45 E malisuas (1,7)	37 Kapamilatan na (3,2)
46 Pamaglolo gigitara	38 Ali tala (1,4)
48 Minindal	41 Pampatalusad
49 Nanung gawan	43 Yanasa
50 Prutas	47 Panuglung amanu

### PAKIBAT:



<https://capampangan.whereishome.info/quiz/2>

## Kuwento: Kapalaran

Bunsu ya y Delang kareng limang mikakapatad, at medyo mengapasunuran kareng pengari na at kapatad. Meyari yang modista, at medyo mahilig keng bie masaya at papasyal-pasyal.

Ating marubdub maglolo caya, a e na na naman buri, dapot makanyan man, tutuki ya pa mu ring mamasyal kayabe na ning maglolo, bisa man atin no mang kayabe aliwa kareng kaluguran nang Delang.

Misan a gatpanapun, tinuki ya y Delang magpasyal keng maglolo, keng kapaniwala' nang atin lang aliwang kayabe. Ngeni pala, nilansi ne ning maglolo at ila mung adua. Balak ne palang itakas ning lalake at ipusitara, aguiang e na kaburian.

Tidtud ne ning lalaki keng bale ra, bistaman e no man misiping. Sabi nang Delang, muli ya't muli panga-kabukasan, at e pakasal keng lalaki anggang nanung maliari, lalu't ala namang milyari karela.

Pangabukas, dintang la deng pengari nang Delang, at pisabyan da ing milyari. Sabi nang Delang, e ya pakasal at tuki yang muli, uling e na ne man talagang sintu ing lalaki, at ala namang milyari.

Dapot deng pengari na, isipan da naman ing kamarinayan a danasan nang Delang keng milyari, at kinumbinsi re ing anak da, anya oita, mepilitan yang pakasal ing Delang, bistaman laban keng lub na. Miyabe lang pane mipapate at mibubungil, pero mika-anak no man.

Misan, atin yang akilala ing Delang keng pamag-modista na, at metuksu yang magkasala, lalu na't mekapag-obra ya keng Saudi ing asawa na. Agkat ne pin kanu ning lalaki a maki-kawani ya keng asawa na at lumaut lang adua keng aliwang lugal. Dapot uli da reng anak nang Delang, e ya tinuki. Pilit yang manintun paralan y Delang nung makananu yang makatakas keng bie na, a e re usgahan deng kabaryu na.

Mekapag-apply ya y Delang keng aliwang bansa ban e na muli. Likuan na la reng anak na kareng pengari na, pansamantala, at balak na lang kunan datang ing aldo.

--- ooOoo ---


## Kanta: Anak a Masipag

Yaku ing anak  
A babaing/lalaking masipag  
Agad migigising  
Kabuklat ning abak  
Manyaklu kung danum  
Maningat kung anak  
Magtinda kung gule  
Ebun ampong gatas.

Patitingapun ku  
Durulung marangle  
Manugak, sumakul  
Mamulut kung pale  
Pangaras ku bale  
Yaku pang manese  
E ku anti kekang  
Masakit kasabe.

--- ooOoo ---

## Poesia: Kapampangan Tamu



Central Luzon Daily, kapamilatan nang Poetisa Laureada Marites Magtuloy Evangelista.

Kapampangan manuan ka mibait kang Kapampangan  
Pekamatikas kang lahi keting dane ning Aslagan  
Mayaman ka keng istoria, makule ka kasaysayan  
Ing labuad mu pekamal de ring kekang kanununuan  
Bie at daya pihunan da keng tagle mung katimawan  
Dit man e re pikarine ing Amanung kekang Sisuan.

Ing Amanu mung minana keng kanununuan mung Nunu  
Amanu yang e inandam sarili meng katutubu  
Den mang Kastilang miniakup mekad keng rikit na't lagu  
Merapat dang e re patdan bagkus meyapan abalu  
Maigit atlundalang banua lante ya pang anting guintu  
Makananu meng sinusu keng miningat kekang Indu.

Panaun nang malikid ka lingunan me Kapampangan  
Balikdan me ing Amanung Tibuan mu at kebaitan  
Ganakan me ing Amanung Sisuan mu at kegisingan  
Atin pa waring siualang kasing sakdal nung dandaman  
Ninung salitang banyaga - Tagalog ya o Ingles man  
Makatigko keng pusu mu keng oras mung kalungkutan.

Inia keka Kapampangan ngakung mitmung sentimientu  
Pamingua me't pakamalan ing beitan mung Amanu  
Uling alang nanung bague miulaga keti yatu  
A asali ning pibandian o asaclo ning beluan mu  
Nu mang labuad ka mipadpad, maguing Ari ka man ninu  
Ing marka mung Kapampangan tatak me ning pangatau.

Ngara ing kanung "Ninuman e lugud keng salita na  
Keng asan mang sakdal lanam at animal mas saul ya."  
Dapot ika Kapampangan nang sangkan mung mapalsala  
Kabang ing kekang salita Amanu yang pamalsinta  
Inya yang panyalita mu at laganas mung pamilya  
Anti ring pipumpunan mu katungkuluan meng pamana.

---

*Maragul a pasalamat ing parikil kang PL Marites  
Magtuloy Evangelista, at Central Luzon Daily.*

--- ooOoo ---

## **Kumidya:** Pasalwan na po

Tagpu keng metung a tindahan inyang minuna:

Sasali #1: Pasalwan na pung colgate?

Magtinda: Nanung Colgate?

Sasali #1: Ita pu kanung Close-Up.

---

Sasali #2: Pasalwan na pung Lux?

Magtinda: Nanung Lux?

Sasali #2: Ita pu kanung Lifeboy.

---

Sasali #3: Pasalwan na pung Tide?

Magtinda: Nanung Tide?

Sasali #2: Ita pu kanung Breeze.

--- ooOoo ---

Salamat pu keng pamamasa.

Antabayanan taya ing katuking bilang keng tutuking Domingo.